



Xalq so'zi

O'zbekiston —
kelajagi
buyuk
davlat

2024-YIL — YOSHLAR VA BIZNESNI QO'LLAB-QUVVATLASH YILI

1991-yil 1-yanvardan chiqa boshlagan

WWW.XS.UZ

E-mail: Info@xs.uz

2024-yil 17-may, № 96 (8719)

Juma

Saytimizga o'tish uchun QR-kodini
telefoningiz orqali skaner qiling.



SAN'AT VA MADANIYATGA E'TIBOR MA'NAVIYATI YUKSAK AVLODNI TARBIIYALASHNING MUHIM SHARTI

Prezident Shavkat Mirziyoyev 16-may kuni Toshkent shahrida O'zbekiston xalq artisti Botir Zokirov haykalining ochilish marosimida ishtirok etdi, madaniyat va san'at sohasidagi yangi maskan va loyihalar bilan tanishdi.



Davlatimiz rahbari milliy estrada san'ati asoschisi, O'zbekiston xalq artisti Botir Zokirov haykali ochilishi munosabati bilan o'tkazilgan tadbirda san'at muxlislarini qizg'in tabrikлади.

— Bugun yurtimizda katta shodiyona — san'at va madaniyat bayrami. Azim Toshkent shahrining qoq markazida xalqimizning ardoqli farzandi, O'zbekiston xalq artisti Botir Zokirov xotirasiga bag'ishlab muazzam haykal ochilmoqda. Mana shu quvonchli voqea munosabati bilan siz, azizlarni, rahmatli Botir Zokirovning yaqinlari,

shogird va muxlislarini, butun xalqimizni chin qalbidan samimiy muborakbod etaman, — dedi Prezident.

Botir Zokirov 1936-yilda san'atkorlar oilasida tug'ilib, voyaga yetgan. 29 yoshida O'zbekiston xalq artisti unvoniga sazovor bo'lgan. 2000-yilda "Buyuk xizmatlari uchun" va 2021-yilda "El-yurt hurmati" ordenlari bilan mukofotlangan.

Davlatimiz rahbari xonandaning benazir iste'dod va insoniy fazilatlarini e'tirof etdi.

Botir Zokirov juda qisqa — 49 yil umr ko'rgan.

Lekin shu yillar davomida o'zidan rang-barang va boy ijodiy meros qoldirgan. Uning sehrli ovozi yurtimizdagi har bir xonadonga kirib borib xalqimiz qalbidan, san'atimizning oltin fondidan joy olgan. Dunyoning madaniyat poytaxtlarida o'zbek san'atini zo'r muvaffaqiyat bilan namoyish etgan.

Xonanda 1955-yilda, ayni kuchga to'lgan paytida og'ir dardga yo'liqadi. Bir necha marta jarrohlik amaliyotlarini boshidan o'tkazadi. Shifokorlar unga qo'shiq aytishni taqiqlab qo'yadi.

Lekin shu ahvolda ham ijoddan, kuylashdan to'xtamaydi.

Botir Zokirov umr bo'yi yangilikka intilib yashardi. Sharq folklori va zamonaviy estrada san'atini uyg'unlashtirib, "Myuzik-xoll" ijodiy jamoasini tashkil etgan, xonanda va kompozitor sifatida ko'plab iste'dodli yoshlarga ustozlik qilgan. Respublikamizda xizmat ko'rsatgan "Yalla" ansamblining tashkil topishida Botir Zokirovning xizmatlari beqiyosdir.

Buyuk san'atkorning so'nmas xotirasini e'zozlash, ijodiy merosini o'rganish bo'yicha ko'p

ishlar qilinmoqda. Xususan, Prezident qarori qabul qilinib, 2021-yilda Botir Zokirovning 85 yillik tavallud ayyomi keng nishonlandi. Ulug' hofiz nomidagi milliy mukofot ta'sis etildi. U haqda ilmiy va badiiy asarlar, hujjatli film va spektakllar yaratildi. Yaqinda Botir Zokirovning xotira kechasi mamlakatimiz jamoatchiligi hamda xorijiy davlatlardan tashrif buyurgan atqli san'atkorlar ishtirokida katta shodiyona sifatida o'tkazildi.

O'zbekiston Respublikasi Prezidenti
Matbuot xizmati suratlari.

O'ZBEKISTON RESPUBLIKASI PREZIDENTI SHAVKAT MIRZIYOYEVNING O'ZBEKISTON XALQ ARTISTI BOTIR ZOKIROV HAYKALINING OCHILISHIGA BAG'ISHLANGAN TANTANALI MAROSIMDAGI NUTQI

Assalomu alaykum, qadrlı vatandoshlar!

Hurmatli madaniyat va san'at namoyandalari!

Bugun yurtimizda katta shodiyona — san'at

va madaniyat bayrami. Azim Toshkent shahrining qoq markazida xalqimizning ardoqli farzandi, O'zbekiston xalq artisti Botir Zokirov xotirasiga bag'ishlab muazzam haykal ochilmoqda.

Mana shu quvonchli voqea munosabati bilan siz, azizlarni, rahmatli Botir Zokirovning yaqinlari, shogird va muxlislarini, butun xalqimizni chin qalbidan samimiy muborakbod etaman.

Muhtaram do'stlar!

Muqaddas yurtimiz zaminidan asrlar davomida ne-ne buyuk alloma va shoirlar, adib va me'morlar, muhandis va rassomlar, hofiz va bastakorlar yetishib chiqqanini yaxshi bilamiz. XX asrda ana shunday ulug' zotlarning munosib davomchisi bo'lib Botir Zokirov san'at maydoniga chiqdi.

Barchamizga ma'lumki, u O'zbekiston xalq artisti Karim Zokirov va xonanda Shohista Saidova oilasida, ziyoli bir muhitda tug'ilib, voyaga yetgan edi.

Taqdir Botir Zokirovning zimmasiga o'zbek estrada san'atining asoschisi bo'lishdek ulug'vor bir vazifani yukladi va bu vazifani u sharaf bilan ado etdi.

U san'at olamiga qadam qo'ygani respublika va sobiq ittifoq sahnalarida biri-biridan buyuk va betakror xonandalar shuhrat cho'qqisiga ko'tarilib ulgurgan edi. Ana shunday mashhur san'at darg'alari orasida munosib o'rin egallash oson emas edi.

Ammo Alloh taoloning o'zi Botir Zokirovga ato etgan benazir iste'dod va insoniy fazilatlar tufayli u san'at olamida chinakam mo'jizalar yaratdi.

Bunday yuksak darajaga erishish uchun u avvalo xalqimizning qadimiy tarixi va boy madaniyatiga, mumtoz musiqa merosimiz, milliy va umumbashariy qadriyatlariga tayandi.

Botir Zokirov hayot mashhaqqatlaridan qo'rqmaydigan, har qanday sharoitda ham faqat ezuq maqsad sari intiladigan beqiyos iroda va matonat sohibi edi.

Xonanda 1955-yilda, ayni kuchga to'lgan paytida og'ir dardga yo'liqdi. Xastalik tufayli bir necha marta qo'yoq murakkab tibbiy operatsiyalarni boshidan o'tkazdi. Shifokorlar hofizning hayotini saqlab qolish uchun unga qo'shiq aytishni taqiqlashga majbur bo'ldilar.

Ammo "Kuylamog' — yashamoq demakdir" degan e'tiqodni hayot mazmuni deb bilgan, ismi jismiga mos o'zbek o'g'loni qo'shiq aytishdan to'xtamadi. Qalbidagi ezuq tuyg'ularni yanada to'lib-toshib kuyladi. Hech shubhasiz, bunday

jasorat, san'atga bunday fidoyilik cheksiz hayrat va tahsinga loyiqdir.

Aziz yurtdoshlar!

Botir Zokirov yashab ijod qilgan murakkab zamonda uning iste'dodi, shon-shuhratiga g'arazli ko'z bilan qaraydigan kimsalar ham, afsuski, yo'q emasdi. Lekin hayotni kurash maydoni deb bilgan bu matonatli inson barcha to'siqlarni mardonada yengib o'tdi.

Betakror hofizning billurdek tiniq ovozida xalqimizning asriy orzu-armonlari, yorug' kunlarga ishonchi baralla yangradi. U qisqa muddatda sobiq sho'ro makonida millionlab ixlosmandlarga ega bo'lgan sevimli san'atkorga aylandi. Botir Zokirov SSSRdagi barcha yirik shaharlar, dunyoning manaman degan madaniyat poytaxtlarida o'zbek san'atini zo'r muvaffaqiyat bilan namoyish etdi.

Xonandaning ijodiy repertuari uning go'zal va hassos qalbi singari keng edi. Uni hindlar — hind deb, fransuzlar — fransuz, arablar — arab qo'shiqchisi deb qabul qilishar edi.

Ayniqsa, 1966-yili Parijga qilgan ijodiy safari Botir Zokirovga olamshumul shuhrat keltirdi. Ushbu shahardagi mashhur "Olimpiya" teatri sahnasiga ko'tarilib, ikki marta kuylash — e'tibor bering, ikki marta kuylash — dunyoda kamdankam ijrochiga nasib etgan. Noyob iste'dodi bilan jahonni zabt etgan bunday afsonaviy san'atkorimiz bilan har qancha faxrlansak, g'ururlansak arziydi.

Qadrlı marosim qatnashchilari!

Botir Zokirov juda qisqa — bor-yo'g'i 49 yil umr ko'rdi. 29 yoshida O'zbekiston xalq artisti unvoniga sazovor bo'ldi. Salkam 30 yillik faoliyati davomida o'zidan rang-barang va boy ijodiy meros qoldirdi. O'lmas hofizimizning sehrli ovozi yurtimizdagi har bir xonadonga kirib borib san'atimiz oltin fondidan, xalqimiz qalbidan mustahkam o'rin egalladi.

U umr bo'yi yangilikka intilib yashagan, izlanishdan charchamaydigan, odamlarga mehribon, oliyanob bir inson edi. Sharq folklori va zamonaviy estrada san'atini uyg'unlashtirib, "Myuzik-xoll" ijodiy jamoasini tashkil etgani, xonanda va kompozitor sifatida ko'plab iste'dodli yoshlarga mehr ko'rsatib ustozlik qilganini alohida ta'kidlash lozim.

Xususan, respublikamizda xizmat ko'rsatgan "Yalla" ansamblining tashkil topishida Botir Zokirovning xizmatlari beqiyosdir. Mana, 50 yildirki, ushbu musiqiy jamoa va uning rahbari, 6 ta mamlakatning "Xalq artisti" degan sharafli unvonga sazovor bo'lgan mashhur xonandamiz Farrux Zokirov jonajon O'zbekistonimiz shuhratini butun dunyoga tarannum etib kelmoqda.

Bugungi davramizda O'zbekiston xalq artisti Gavhar Zokirovani, Ravshan va Bahodir Zokirovlarni, Zokirovlar sulolasining boshqa ko'plab vakillarini ko'rib turganimdan xursandman. Ayniqsa, Gavhar Zokirovning ma'naviyatimiz fidoyisi sifatida ko'plab shahar-qishloqlarimizni kezb amalga oshirayotgan ezuq ishlari, yosh avlod tarbiyasi yo'lidagi katta xizmatlari uchun chin qalbidan tashakkur bildiraman.

Muhtaram do'stlar!

Botir Zokirov tom ma'noda vatanparvar inson edi. Ona O'zbekistonimizni, azim Toshkentni cheksiz farzandlik mehri bilan sevar, mahoratlari rassom, talantli adib va aktyor sifatidagi faoliyatida ham Vatanga muhabbat tuyg'usi jo'sh urib turar edi.

U o'tgan asrning 70-yillarida xalq qahramoni Spitamen haqida "So'g'd elining qoploni" opera librettosini yaratgan va bu asar Alisher Navoiy nomidagi O'zbekiston davlat akademik katta teatrida muvaffaqiyat bilan namoyish etilgan edi.

Bularning barchasi Botir Zokirovning olmosdek serqirra iste'dod egasi bo'lganini tasdiqlaydi.

Hurmatli yurtdoshlar!

Inson qadrlini ulug'lash — Yangi O'zbekiston siyosatining ustuvor yo'nalishidir. Ayni shu maqsadda buyuk san'atkorimiz Botir Zokirovning milliy estrada san'ati instituti barpo etildi. Ushbu hofizimiz nomidagi milliy mukofot ta'sis etildi, estrada ijrochilarining respublika ko'rik-tanlovi muntazam o'tkazib kelinmoqda. Botir Zokirov haqida ilmiy va badiiy asarlar, hujjatli film va spektakllar yaratilmoqda, ilmiy anjumanlar, ijodiy uchrashuv va kechalar o'tkazilmoqda.

O'zbekiston davlat konservatoriyasi huzurida, ko'rib turganingizdek, Botir Zokirov nomidagi milliy estrada san'ati instituti barpo etildi. Ushbu oliygohda tahsil olayotgan navqiron yoshlarimiz orasidan Botir Zokirov kabi ulug' san'atkorlar albatta yetishib chiqadi, deb ishonamiz va ularning barchasiga omad va zafarlar tilaymiz.

Yaqinda Botir Zokirovning xotira kechasi mamlakatimiz jamoatchiligi hamda xorijiy davlatlardan tashrif buyurgan, u kishining do'stlari bo'lmish atqli san'atkorlar ishtirokida katta shodiyona sifatida o'tkazildi.

Ushbu musiqiy anjuman xalqimizning o'z

ardoqli farzandiga bo'lgan yuksak ehtiromining yana bir yorqin namoyoni bo'ldi.

Muhtaram do'stlar!

Albatta, bugun sizlarning ishtirokingizda ochilayotgan ushbu muhtasham haykal Botir Zokirov xotirasiga o'rnatilgan ramziy bir timsoldir. Ayni paytda Yangi O'zbekistonda madaniyat va san'atni ravnaq topirish yo'lidagi olib borayotgan barcha islohotlarimiz va ularning amaliy natijalari bu ulug' ijodkorga eng munosib yodgorlik bo'ladi, desam, o'ylaymanki, sizlar ham bu fikrga qo'shulasiz.

Hozirgi kunda yurtimizdagi yuzlab musiqa va san'at maktablarida, texnikum va kollejlarda, madaniyat yo'nalishidagi institutlarimizda, konservatoriyamizda minglab iste'dodli yoshlarimiz bilim va tarbiya olmoqda. Biz ana shunday iqtidorli o'g'il-qizlarimizni milliy san'atimiz vorislari, barkamol, vatanparvar insonlar etib voyaga yetkazsak, atqli san'atkorimizning ruhi albatta shod bo'ladi.

Shuni alohida ta'kidlash kerakki, Botir Zokirov ijodiy fenomeni milliy san'atimiz tarixida butun boshli bir davrni tashkil etadi.

Ulug' san'atkorimizning xotirasini abadiylashtirish, boy merosini chuqur o'rganish va jahon miqyosida targ'ib qilish bo'yicha boshlagan ishlarimizni davom ettirish maqsadida Vazirlar Mahkamasiga ikki oy muddatda ushbu masala bo'yicha yangi qaror loyihasini tayyorlash topshirildi.

Qarorda, jumladan, Toshkent shahrida Botir Zokirov memorial muzeyini barpo etish, estrada san'ati bo'yicha Botir Zokirov nomidagi xalqaro ko'rik-tanlov tashkil qilish, madaniyat va san'at oliy o'quv yurtlarining talabalari uchun Botir Zokirov nomidagi davlat stipendiyasini joriy etish, "Botir Zokirov" badiiy filmini yaratish, Botir Zokirov nomidagi jamg'arma va Milliy estrada simfonik orkestri faoliyatini har tomonlama qo'llab-quvvatlash kabi vazifalar ko'zda tutilishi lozim.

Fursatdan foydalanib, ushbu hududni obod etishga munosib hissa qo'shgan barcha yurtdoshlarimizga, qo'ligul quruvchi va muhandislar, haykaltarosh va me'morlarga samimiy minnatdorlik bildiraman.

Barchangizni bugungi shodiyona kun bilan yana bir bor tabriklayman. Bu joy poytaxtimiz aholisi va mehmonlari uchun qutlug' ziyoaratgohga aylanadi, deb ishonaman.

Dunyoga Botir Zokirovdek buyuk zotlarni bergan xalqimiz omon bo'lsin!

Milliy san'atimiz doimo gullab-yashnasin!

MALAYZIYA BOSH VAZIRI RASMIY TASHRIF BILAN O'ZBEKISTONGA KELADI

O'zbekiston Respublikasi Prezidenti
Shavkat Mirziyoyevning taklifiga binoan
Malayziya Bosh vaziri Anvar Ibrohim
17 — 19-may kunlari rasmiy tashrif bilan
mamlakatimizda bo'ladi.

Tashrifning birinchi kunida Toshkent shahrida oliy darajadagi tadbirlar va muzokaralar o'tkazilishi rejalashtirilgan.

Sammit kun tartibidan tizimiy siyosiy muloqotni rivojlantirish

va madaniy-gumanitar almashinuvni kengaytirish, savdo, innovatsiyalar, energetika, neft-kimyo, sanoat, elektrotexnika va elektronika, qishloq xo'jaligi va iqtisodiyotning boshqa

sohalarida aniq kooperatsiya dasturlari va loyihalarini ilgari surish masalalari o'rin olgan.

Bundan tashqari, xalqaro kun tartibidagi dolzarb masalalar yuzasidan fikr almashiladi.

Malayziya Hukumati rahbari Samarqand va Buxoro shaharlariga ham tashrif buyurib, xalqimizning boy madaniy-tarixiy va ma'naviy merosi bilan tanishadi, qo'shma biznes forumida ishtirok etadi.

O'ZA.

O'zbekiston — Malayziya:

O'ZARO MANFAATLI HAMKORLIKNING YANGI BOSQICHI

Malayziya Bosh vaziri Anvar Ibrohimning O'zbekistonga tashrifi arafasida mamlakatimizning Kuala-Lumpur shahridagi elchisi Karomiddin GADOYEV "Dunyo" AA uchun intervyu berdi va unda ikki davlat o'rtasidagi munosabatlarning bugungi holati hamda istiqbollari haqidagi fikrlarini bildirdi:

— O'zbekiston va Malayziya keng qamrovli muloqotni jadal va samarali rivojlantirishga alohida e'tibor qaratmoqda. Joriy yil 17 — 19-may kunlari Malayziya Bosh vaziri Anvar Ibrohimning O'zbekistonga tashrifi rejalashtirilgan bo'lib, u turli sohalardagi hamkorlikni faollashtirish va ustuvor yo'nalishlarda yirik qo'shma loyihalarni amalga oshirishga qaratilgan.

O'zbekiston va Malayziya o'rtasidagi geografik masofaga qaramay mamlakatlarimizni tarixiy rishtalar, madaniy va diniy o'xshashlik, an'analarning yaqinligi, bag'rikenglik va

xilmaxillik kabi umumiy qadriyatlar bog'lab turadi.

Bu yil rasmiy Toshkent va Kuala-Lumpur o'rtasida diplomatik munosabatlar o'rnatilganiga 32 yil to'ldi. Malayziya 1992-yil 1-yanvarda O'zbekiston mustaqilligini Janubi-Sharqiy Osiyo mamlakatlari ichida birinchi bo'lib tan olgan.

1992 va 2005-yillarda Malayziyaga, 1993 — 2008-yillarda O'zbekistonga oliy darajadagi rasmiy tashriflar almashinuvi doirasida do'stona munosabatlar va o'zaro manfaatli hamkorlikni rivojlantirish poy-devori qo'yildi.



Oʻzbekiston — Malayziya:

OʻZARO MANFAATLI HAMKORLIKNING YANGI BOSQICHI



Shuningdek, tashriflar davomida bir qator istiqbolli sohalarda hukumatlararo hujjatlar imzolangan edi. 2003-yilda Malayziya Podshohi Sayid Sirojuddin Oʻzbekistonga tashrif buyurdi. Soʻnggi yillarda mamlakatlarimiz oʻrtasidagi aloqalar sezilarli darajada mustahkamlandi. Ikki tomonlama hamkorlikda ijobiy natijalarga erishildi, siyosiy muloqot faollashdi, tomonlar xalqaro tashkilotlar doirasida bir-birini faol qoʻllab-quvvatlamogʻda, oʻzaro manfaatli savdo-iqtisodiy va madaniy-gumanitar aloqalar taraqqiy etyapti.

2023-yil 1-dekabr kuni Dubay shahrida boʻlib oʻtgan BMTning iqlim oʻzgarishi boʻyicha konferensiyasi doirasida Oʻzbekiston Prezidenti Shavkat Mirziyoyev va Malayziya Podshohi Sulton Abdulloh Riyoatuddin Al-Mustaf Billoh Shoh bilan uchrashdi. Ushbu oliy darajadagi muloqot natijalari ikki tomonlama munosabatlarni rivojlantirishning yangi bosqichini boshlab berdi.

Ikki mamlakat qonun chiqaruvchi organlaridagi doʻstlik guruhlar faoliyati doirasida parlamentlararo aloqalar muvaffaqiyatli rivoj topmoqda. 2023 va 2024-yillarda ikki davlat tashqi ishlar vazirlari oʻzaro tashrif almashdilar. Shu yilning fevral oyida Kuala-Lumpurda Oʻzbekiston — Malayziya biznes forumi boʻlib oʻtdi.

2023-yil oktabr oyida Malayziya turizm, sanʼat va madaniyat vaziri Tiong King Sing boshchiligidagi delegatsiya Samarqand shahrida boʻlib oʻtgan Jahon turizm tashkiloti Bosh assambleyasida ishtirok etdi va forum davomida turizm sohasida hamkorlik boʻyicha hukumatlararo anglashuv memorandumini imzolandi.

Oʻzbekiston va Malayziya tashqi siyosat idoralari oʻrtasidagi siyosiy maslahatlashuvlar ikki tomonlama munosabatlarni rivojlantirishning muhim mexanizmi hisoblanadi. Tashqi ishlar vazirligi oʻrtasidagi siyosiy maslahatlashuvlarning navbatdagi davrasini joriy yilda Toshkentda oʻtkazish rejalashtirilgan.

Malayziya Oʻzbekistonning ASEAN davlatlari orasida muhim savdo sherigi hisoblanadi. 2023-yilda ikki davlat oʻrtasidagi oʻzaro tovar ayirboshlash hajmi 2017-yildagiga nisbatan 3 barobar oshib, 190 million AQSh dollarini tashkil etdi. Oʻzbekiston Malayziyaga kimyo, oziq-ovqat, toʻqimachilik mahsulotlari va mevalar eksport qiladi. Malayziya eksport asosiy eksporti mashina va transport uskunalarini, oziq-ovqat va kimyo mahsulotlaridan iborat.

Soʻnggi yillarda malayziyalik investorlarning Oʻzbekistonga qiziqishi tobora ortib bormoqda. Hozirgi kunda Oʻzbekistonda Malayziya kapitali ishtirokidagi 33 ta korxona faoliyat koʻrsatyapti. Eʼtiborlisi, ularning 16 tasi 100 foiz Malayziya kapitali asosida tashkil etilgan.

Oʻzbekiston oʻzining strategik joylashuvi, rivojlangan transport infratuzilmasi va qoʻshni davlatlar bilan mavjud erkin savdo shartnomalari tufayli Malayziya biznesining 80 million aholiga ega Markaziy Osiyo bozoriga kirishi uchun muhim markaz vazifasini oʻtashi mumkin. Oʻz navbatida,

Malayziya oʻzbek biznesi uchun Janubi-Sharqiy Osiyo davlatlari bozorlariga muhim koʻpriklarni taʼminlaydi.

Shu nuqtayi nazardan, transport aloqasi masalalari alohida eʼtiborga loyiq. Bugungi kunda Toshkent va Kuala-Lumpur oʻrtasida “Uzbekistan Airways” AJ va Malayziyaning “Batik Air Malaysia” aviatashuvchisi tomonidan haftasiga 4 ta reys amalga oshirilmoqda.

Shu bilan birga, mamlakatlarimiz Markaziy Osiyo va Malayziya oʻrtasida muqobil transport va logistika yoʻnalishlarini rivojlantirish boʻyicha hamkorlikni davom ettirishdan manfaatdor.

Taʼlim hamkorlikning yana bir muhim sohasi sanaladi. Xususan, ikki mamlakat oliy oʻquv yurtlari va ilmiy muassasalari qoʻshma taʼlim dasturlari doirasida samarali hamkorlik qilmoqda.

Malayziya Bosh vaziri Anvar Ibrohimning yurtimizga birinchi tashrfi va boʻljak oliy darajadagi uchrashuvlar Oʻzbekiston va Malayziya oʻrtasidagi iliq hamda doʻstona aloqalarni yangi bosqichga koʻtarish, birinchi navbatda, savdo-iqtisodiy sohada foydalanilgan salohiyatni faollashtirishga xizmat qilishi, shubhasiz.

Tashrif doirasida, shuningdek, ikki tomonlama hukumatlararo hujjatlar, savdo-iqtisodiy va investitsiyaviy shartnomalar imzolaniishi kutilmoqda. Bugungi kunda xalqaro diplomatiya va turizm markazi sifatida shuhrat qozongan qadimiy Samarqand shahrida navbatdagi Oʻzbekiston — Malayziya biznes forumiga mezbonlik qiladi.

Barqaror iqtisodiy oʻsishni taʼminlash va aholi turmush sifatini oshirish boʻyicha “Malayziya Madani” konsepsiyasi “Oʻzbekiston — 2030” strategiyasi bilan hamohang ekanini ramziy maʼnoga ega. Bu ijtimoiy-iqtisodiy islohotlar va chuqur tarkibiy oʻzgarishlarni amalga oshirishda ijobiy tajriba almashish uchun keng imkoniyatlar ochmoqda.

Bugungi kunda Oʻzbekiston nafaqat Markaziy Osiyo mamlakatlari oʻrtasida integratsiya jarayonlarini rivojlantirish, balki butun mintaq va xorijiy hamkorlar oʻrtasidagi oʻzaro munosabatlarning yangi formatlarini shakllantirishda ham faol rol oʻynamoqda. Oʻz navbatida, Malayziya Janubi-Sharqiy Osiyo davlatlari uyushmasi (ASEAN) asoschilaridan biri sifatida mintaqaviy integratsiya jarayonlarini rivojlantirishda muhim oʻrin tutadi. Ishonchim komilki, Toshkentda boʻljak oliy darajadagi muloqot bizga “Markaziy Osiyo — ASEAN” formatida yangi hamkorlik platformasini yaratishga imkon beradi.

Shubhasiz, Malayziya Bosh vazirining rasmiy tashrfi koʻp asrlik doʻstlik, oʻzaro ishonch va anglashuvning mustahkam poydevoriga asoslangan Oʻzbekiston — Malayziya hamkorligini siyosat, xavfsizlik, savdo-iqtisodiy, investitsiyaviy, transport, atrof-muhitni muhofaza etish, taʼlim, innovatsiyalar, madaniyat va xalq diplomatiyasi sohalarida sezilarli darajada faollashtirishga xizmat qiladi.

Bundan tashqari, tashrif davomida Malayziya Bosh vaziri Anvar Ibrohim boshchiligidagi delegatsiya yurtimizning Samarqand va Buxoro kabi dunyoga mashhur tarixiy shaharlarining diqqatga sazovor joylari bilan yaqindan tanishadi.

“Dunyo” AA.
Kuala-Lumpur

DOLZARB GʻOYA VA TASHABBUSLAR

Osiyoda ayollar huquqlari va gender tenglikni taʼminlashda muhim oʻrin tutadi



Samarqand shahri mezbonlik qilgan Osiyo xotin-qizlari forumi tarixiy voqeeliklarga boyligi va oʻzaro tajriba almashishda oʻziga xos muloqot maydoni vazifasini oʻtaganligi bilan alohida ahamiyat kasb etdi. Xususan, Prezident Shavkat Mirziyoyevning forum ishtirokchilariga yoʻllagan tabrigida ilgari surilgan dolzarb gʻoya va tashabbuslar pirovardida qitʼamiz xotin-qizlarini har tomonlama qoʻllab-quvvatlash hamda ularni davlat va jamiyat ishlariga keng jalb etishda muhim ahamiyatga ega, desak, ayni haqiqat.

Aks sado

Davlatimiz rahbari ayollar iqtisodiy salohiyatini toʻliq ochib berish butun Osiyo qitʼasi taraqqiyotida hal qiluvchi ahamiyatga ega ekanini alohida taʼkidlab oʻtdi. Buning uchun ayollarning davlat boshqaruvi, tadbirkorlik va mehnat bozoridagi ulushini oshirish talab etiladi. Zero, tadbirkor ayollarni koʻpaytirish hamda ularga taʼlim, kasbiy tayyorgarlik va moliyalashtirishdan foydalanish imkoniyatini yaratish xotin-qizlarning iqtisodiy rivojlanishiga yordam beradi. Bu esa, oʻz navbatida, mamlakat taraqqiyotiga salmoqli hissa boʻlib qoʻshiladi.

Qolaversa, tabrikda ayollarga yetakchilik va tadbirkorlik koʻnikmasidan foydalanish uchun platforma va imkoniyatlar berish muhimligi ham qayd etib oʻtiladi. Bu bejiz emas. Insoniyat tarixining gullab-yashnagan davrlari va hozirgi rivojlangan davlatlar misolida ayollarning qaror qabul

qilish va boshqarishdagi faol ishtiroki jamiyatlar ravnaqi, aholi farovonligiga zamin hozirlaganini kuzatish mumkin. Shu bois keyingi yillarda bu borada Oʻzbekistonda dadil qadamlar tashlandi. Natijada parlament va hukumatdagi ayollar soni sezilarli darajada oshirildiki, bu koʻplab sohalardagi yutuq va natijalarimizga ham asos boʻladyotir.

Bundan tashqari, ayollarga sifatli taʼlim hamda kasbiy tayyorgarlik imkoniyatlaridan foydalanishi uchun shart-sharoit yaratib berishga sodiqlik izhor etildi. Negaki, opa-singillarimizning taʼlim va tarbiyasiga sarmoya kiritish nafaqat ular

hayotini yaxshilaydi, balki jamiyatning uzoq muddatli iqtisodiy oʻsishi va rivojiga ham turtki beradi. Shu bois Oʻzbekistonda keyingi davrda tadbirkor ayollar sonini koʻpaytirish boʻyicha dadil qadamlar tashlandi. Natijada ishbilarmonlik yoʻnalishidagi ayollar soni ikki baravar koʻpaydi, taʼlim va kasbiy tayyorgarlikdan foydalanish borasida ham ijobiy natijalar kuzatilmoqda.

Soʻnggi yetti yil ichida Oʻzbekiston davlat boshqaruvi organlarida xotin-qizlar ulushi muttasil oʻsib, 27 foizdan 35 foizga yetdi. Oliy Majlis Qonunchilik palatasi deputatlarining 32 foizi va Senat aʼzolarining esa 25 foizi ayollardir.

Muhimi, bu yoʻnalishdagi saʼy-harakatlar tobora izchillik kasb etmoqda. Ayollarning

“Soʻnggi yetti yil ichida Oʻzbekiston davlat boshqaruvi organlarida xotin-qizlar ulushi muttasil oʻsib, 27 foizdan 35 foizga yetdi. Oliy Majlis Qonunchilik palatasi deputatlarining 32 foizi va Senat aʼzolarining esa 25 foizi ayollardir.”

siyosiy hayotdagi faolligini yanada kuchaytirish maqsadida qonun hujjatlariga siyosiy partiyalardan deputatlikka nomzodlar koʻrsatishda xotin-qizlarning eng kam sonini

HAR TOMONLAMA VA BARCHA UCHUN FOYDALI BOʻLGAN FORUM

Samarqand shahrida 13-14-may kunlari muvaffaqiyat bilan oʻtkazilgan Osiyo xotin-qizlari forumini zoʻr qiziqish va diqqat bilan kuzatib bordik. Unda jahon va ayniqsa, Osiyo ayollarining muammolariga, ularni yechish yoʻllariga katta eʼtibor qaratildi. Oʻzbekistonning xotin-qizlar ogʻirini yengillashtirishga, jamiyatda ularning erkaklar bilan tengligini taʼminlashga oid siyosati eʼtirof etildi.

Forum yakunida olib borilgan muzokara va muhokamarlar natijasi sifatida Samarqand deklaratsiyasi qabul qilangani, unda xotin-qizlar huquqlari kafolatlarini har tomonlama mustahkamlash va ularni amalda taʼminlash, gender tenglikka erishish, zoʻravonlikka barham berish, gumanitar huquqni hurmat qilishga qaratilgan maqsadlar aks etgani ham qitʼamizda yashayotgan har bir ayolning qalbidagi umid uchungunlarini alangalatgan boʻlsa, ajab emas. Zero, deklaratsiyada Osiyo mamlakatlarda XXI asrda har kim tenglik, taraqqiyot va farovonlik sharoitida yashab, adolati dunyo barpo etish yoʻlida xotin-qizlar va erkaklar birgalikda harakat qiladigan jamiyat shakllanishini taʼminlash vazifasi qoʻyildi.

“Ayol bir qoʻli bilan beshikni tebratsa, ikkinchi qoʻli bilan dunyoni tebratadi”, degan ibora bejiz aytilmagan. Buning ortida ayolning har qanday keng koʻlamli ishlariga aralasha olishi va katta natijalarga erishish uchun juda koʻp imkoniyatlarga ega ekanligidan dalolat beruvchi maʼno yotadi. Zero, jamiyat va hatto dunyo taraqqiyoti, turli sohalardagi yutuqlarida ayollarning hisssasi katta ekanini ayni haqiqat.

Afsuski, bugungi dunyoda xotin-qizlarga tovar sifatida qarash yoki sitash uchun foydalanish, ularga nisbatan zoʻravonlik, zoʻrluk bilan uy xizmatkori sifatida saqlash, taʼlim olish imkoniyatidan mahrumlik kabi muammolar koʻzga tashlanadi. Osiyo xotin-qizlari forumi ana shu muammolarni bartaraf etish, ayollarning huquq va erkinliklarini kengroq taʼminlash haqida qaror qabul qilgani bilan ahamiyatlidir.

“Xotin-qizlarning iqtisodiy, ijtimoiy va siyosiy huquq hamda imkoniyatlarini kengaytirish masalalariga mintaqaviy yondashuv” mavzuiga bagʻishlangan forumda Osiyoning yetakchi ayol rahbarlari, 30 dan ortiq xorijiy davlatlardan 81 nafar nufuzli mehmon — Sharqiy Osiyo, Janubi-Sharqiy Osiyo, Janubiy Osiyo va Markaziy Osiyo mamlakatlari parlamentlarining ayol aʼzolari qatnashgani anjuman nufuzidan dalolatidir.

Oʻzbekiston Prezidenti Shavkat Mirziyoyev tashabbusi bilan tashkillashtirilgan anjuman, eng avvalo, mintaga mamlakatlari yetakchi ayollarining bunyodkorlik salohiyatini roʻyobga chiqarish, ularning davlat va jamiyat boshqaruvi hamda iqtisodiyotdagi ishtirokini yanada kengaytirish borasida tajriba almashishga imkon berdi.

Ikkinchidan, forum xotin-qizlarning fan, taʼlim va innovatsion faoliyatdagi ishtiroki hamda raqamli texnologiyalardan foydalanishi, hozirgi global iqtisodiyotda ayollarning iqtisodiy imkoniyatlarini kengaytirish orqali kambagʻallikni kamaytirish, tadbirkorlik, yetakchilik va innovatsiyalarga jalb etish masalalarini muhokamadan oʻtkazish maydoni boʻlib xizmat qiladi.

Uchinchidan, BMTning Barqaror rivojlanish maqsadlariga erishishda xotin-qizlarning ishtiroki masalasi koʻrib chiqildi.

Toʻrtinchidan, ayollarning iqtisodiy imkoniyatlarini kengaytirish, biznes



hujjatlar imzolandi. Ularning huquq va manfaatlarini toʻliq taʼminlash, onalik va bolalikni muhofaza etish masalalari yangi qabul qilingan Konstitutsiya, “Oʻzbekiston — 2030” strategiyasi va 2030-yilga qadar Oʻzbekiston Respublikasida gender tenglikka erishish strategiyasi kabi konseptual hujjatlarida oʻzining toʻliq ifodasini topdi. Natijada ayollarning davlat va

“Osiyo ayollari forumi gender tenglikka erishishni tezlashtirish va kambagʻallikni bartaraf etish orqali xotin-qizlarning huquq va imkoniyatlarini kengaytirishga qaratilgan saʼy-harakatlarga kuchli turtki beradi. Zero, butun dunyoda ayollarning, xususan, qiz bolaning oʻqib, oliy maʼlumotli boʻlishi, kasb-hunar egallashi oila baxti, farzandlar kamoli, shu asosda butun jamiyat ravnaqi uchun xizmat qiladi.”

va jamiyatda ularning ishtirokini ragʻbatlantirishda parlamentlarning oʻrni, genderga yoʻnaltirilgan byudjetlashtirish, moliyaviy imkoniyatlardan foydalanishda gender tafovutini bartaraf etish, xotin-qizlar va bolalarga nisbatan zoʻravonlikning barcha shakliga barham berish masalalariga alohida eʼtibor qaratildi. “Yashil” iqtisodiyotni targʻib qilish, ilqim oʻzgarishining mintaqadagi gender muammolarga taʼsiri masalasida hamda xotin-qizlarning huquq va manfaatlarini himoya qilishda nodavlat notijorat tashkilotlarining ilgʻor tajribasi va innovatsion yondashuvlari ham koʻrib chiqildi.

Umuman, forum Oʻzbekistonning xotin-qizlar manfaatlarini, gender tenglikni taʼminlash va oilalar mustahkamligi borasidagi tajribasini xalqaro jamoatchilikka yaqindan tanishtirish va oʻrtoqlashish imkonini berdi.

Aytish joizki, davlatimiz rahbarining kuchli irodasi tufayli boshlangan islohotlar siyosati buyali ijtimoiy-siyosiy, iqtisodiy hamda maʼnaviy hayotda, muhim qarorlar qabul qilinishida xotin-qizlarning ishtirokini sezilarli ravishda kengaytirildi. Sohaga doir xalqaro standartlarga mos milliy qonunchilik bazasi shakllantirildi, soʻnggi besh yilda 80 dan ortiq normativ-huquqiy

sharoitini yaxshilash va kreditning boshlangʻich badalini toʻlash uchun 200 mlrd. soʻm subsidiya ajratilganini qayd etish lozim.

Ahamiyatlisi, joylarda xotin-qizlar muammolarini oʻrganish va hal etishga qaratilgan ishlar yangi bosqichga koʻtarilmoqda. Oʻtgan yilning oʻzida “ayollar daftari” boʻyicha 1 trln. 234 mlrd. soʻm hisobidan qariyb 994 ming nafar xotin-qizning muammosi hal etilgani bu fikrni tasdiqlaydi.

Bugungi kunda xotin-qizlarga taʼlim, ilm-fan bilan shugʻullanish uchun barcha sharoit yaratildi. Ayollar uchun imtiyozli kreditlar, maxsus kvotalar ajratildi, magistraturada oʻqiydiganlarning shartnoma toʻlovlarini toʻliq Davlat budjetidan qoplashni davlat oʻz zimmasiga oldi. Hozirda oliy taʼlim muassasalarida tahsil olayotgan talabalarning yarmidan koʻpini qizlar tashkil etmoqda. Agar oliy taʼlimga qamrovning 2017-yildagi 9 foizni hozirgi 43 foiz qamrov bilan solishtirsak, oliy taʼlimda qizlar ulushi keskin ortganini koʻrishimiz mumkin.

Shuningdek, ayollar shu paytgacha anʼanaviy boʻlgan taʼlim, tibbiyot, tikuvchilik yoʻnalishlaridan tashqari raqamli iqtisodiyot, axborot texnologiyalari kabi ilgʻor sohalarga faol kirib keldi. Boz ustiga, onalik va bolalikni muhofaza qilish, xalqimiz genofondini mustahkamlash ustuvor vazifaga aylangan.

Afsuski, dunyoning hamma nuqtasida ham ahvol birdek emas. Jahonning aksariyat mamlakatlari ayollarning huquq va imkoniyatlarini kengaytirish yoʻnalishidagi muvaffaqiyatlari bilan maqtana olmaydi, erkak va ayollarning tengligi masalasini oʻrgangan va bu borada hisobot tayyorlagan BMTning Taraqqiyot dasturi va “BMT-Ayollar” tuzilmasi maʼlumotlariga koʻra, sayyoramiz ayollarining bir foizdan kamrogʻi gender huquqlar, masalan, taʼlim va sogʻliqni saqlash sohalarida taʼminlangan davlatlarda yashashadi.

Qolaversa, dunyoda sodir boʻlayotgan turli inqirozlar, urush va nizolar, ilqim oʻzgarishlaridan, birinchi navbatda, ayollar va bolalar aziyat chekmogʻda. Maʼlumotlarga koʻra, hozir shu kabi taʼsirlar va kambagʻallik 158 mln. nafar xotin-qiz hayotini izdan chiqargan. Ayni paytda dunyoda har uchinchi ayol yuqda, jamoat joylarida, ishxonasida yoki media maydonda

Shu maʼnoda aytisak, Osiyo qitʼasi mamlakatlari xotin-qizlar haq-huquqlarini himoya qilish, ularni har tomonlama qoʻllab-quvvatlash va gender tenglikni taʼminlash borasida oʻzining boy tajribasiga ega. Shuning uchun ham Osiyo davlatlarining yetakchi xotin-qizlari mazkur sohadagi mavjud muammo va masalalarni koʻrib chiqish, bir-biridan ijobiy tajribalarni oʻrganish, muhim boʻlgan qarorlarni qabul qilish va doʻstona munosabatlarni oʻrnatish maqsadida Samarqandda yigʻildi.

Bu har tomonlama va barcha uchun birdek manfaatli hamda foydali boʻldi, desak, ayni haqiqatdir.

nomzodlar umumiy sonining 30 foizidan 40 foizigacha koʻpaytirishga qaratilgan tegishli oʻzgartirishlar kiritildi. Bu ham, albatta, mamlakatimizning xotin-qizlar imkoniyatlarini kengaytirish va ularning siyosiy hayotga toʻliq integratsiyalashuviga sodiqligini koʻrsatib turibdi.

Shuni alohida aytish joizki, davlatimiz rahbari oʻz tabrigida forum ishtirokchilari eʼtiborini zaif va ijtimoiy yordamga muhtoj ayollar ehtiyojlariga qaratdi. Shu munosabat bilan ijtimoiy himoya, iqtisodiy yordam va sifatli sogʻliqni saqlash hamda taʼlim olish imkoniyatini beradigan dastur va qoʻllab-quvvatlash mexanizmlarini ishlab chiqish zarurligi urgʻulandi. Ehtiyojmand ayollarga gʻamxoʻrlilik qilish nafaqat axloqiy majburiyat, balki yanada adolati va barqaror jamiyat rivojini ham kafolatlaydi.

Umuman olganda, davlatimiz rahbari tomonidan ilgari surilgan tashabbuslar oʻzining dolzarbligi va hayotiyiligi bilan xalqaro hamjamiyat eʼtiborini qozondi.

Ishonch bilan ayta olamizki, bu gʻoya va tashabbuslar forumda koʻrib chiqilgan dolzarb masalalarga ijobiy yechim topishda dasturilamal boʻladi. Albatta, ular dan kelib chiqadigan vazifalar ijrosi biz, xalq vakillarining ham zimmasiga katta masʼuliyat yuklaydi.

Narimon UMAROV,
Oliy Majlis Senatining
Sud-huquq masalalari va
korruptsiyaga qarshi kurashish
qoʻmitasi raisi.

